

CAPUT XVII.

VIRTUS REGIA.

1. KUMUDVATIS e KUSA filium nacta est, ATITHEM appellatum, veluti mens ab ultima noctis hora claritatem accipit.
2. Ille, patre gaudens, incomparabili splendore præditus, patris sui matrisque gentes puras reddidit, ut sol utramque viam, septentrionalem atque meridionalem.
3. Illum pater, intelligentium eximius, primo tribus suæ scientiarum summam comprehendere, deinde puellarum regiarum manum sumere fecit.
4. KUSAS nobilis, heros, temperatus, se ipsum unum per illum æque nobilem, fortem, moderatumque, multiplicem redditum putabat.
5. Qui cum INDRÆ societatem, stirpi suæ congruam, adeptus esset, DURJAYAM dæmonem in prælio occidit, ipseque ab illo necatus est.
6. Eum sequebatur KUMUDVATIS, KUMUDÆ serpentum regis soror, ut KAUMUDIS sequitur Lunam, lotos exhilarantem.
7. Eorum alter INDRÆ solii parte fruebatur, altera SACHIS amica facta, *Párijátæ* arboris portionem accepit.
8. Ejus filium ministri senes ad imperium inaugurabant, memores ultimi mandati, quod rex, cum in pugnam abiturus esset, iis dederat.
9. Illi ad ejus inaugurationem per fabros novum palatium extrui curabant, ara elata præditum, quattuor columnis fulcitum.
10. Ibi ei, in sella solemni sedenti, consilarii administrabant aquas, in vasibus aureis e fluviis sacris allatas.